



Amez la piazza avev'ins piazzà in palet cun televisiuns veglias. Ins ha pudì martellar sin quels objects.



FOTOS A. BEELI  
Martin Vincenz avant ch'el ha pledà sco representant da l'economia turistica dal Grischun.

# Caleidoscop da la cultura grischuna

Cussegliera federala Simonetta Sommaruga a la manifestaziun contra No-Billag a Cuira

■ (anr/abc) Dapi ch'ins discuteschia da l'iniziativa No-Billag vegnia era discurre bier da «Glanz und Gloria», ella na sappia dentant propi betg pertge, ha cussegliera federala Simonetta Sommaruga declarà sonda passada a Cuira. In giaja per dapli, per bier dapli che glischur e traglischur. La magistrata n'ha strusch stui persvader insatgi sin la Piazza Alexander. La gronda manifestaziun è stada plitost ina demonstraziun da la qualitat e da la multifariadad culturala dal Grischun. Ella saja vegnida gugent a Cuira, en la citad la pli veglia da la Svizra. Quà na stoppian ins declarer a nagin quant impurtant ch'istorgias e tradiziuns sajan. Quai ha cussegliera federala Simonetta Sommaruga declarà en ses pled.

## Coesium, grazia a la SRG SSR

Duas uras avant ch'ella è vegnida aveva l'occurrènza cumenzà. La citad da Cuira n'era anc betg en il sulegl. Il cuntrari, ina fradaglia sco quai ch'igl'era mai stà quest enviern, ha beneventà ils emprims visitaders. Andy Kollegger, l'organisatur principal da la «Manifestation» sin la Piazza Alexander amez la citad, traglischava sco il sulegl da San Murezzan. Ensemen cun Susanna Fanzun e Nikolaus Schmid è el stà responsabel per ina manifestaziun ch'ha vulì resplender la varietad culturala dal Grischun. La gliעד ch'è vegnida en il decurs da l'avantmezdi ha tadlà ils emprims discurs dals exponents. Marietta Kobald, Koni Allemann ed Elisabeth Mani-Heldstab han represchentà la cultura dals Gualsers. Pascal Jenny ha pledà sco responsabel dal «Arosa Humorfestival», ina mes'ura pli tard sco commem-

ber dal comité executiv Swiss Olympic. Domaduas spartas èn colliadas ferm cun la SRG SSR. Grazia a l'emettur nazional pon ins vesair en la televisiun pli che 1000 disciplinas sportivas ed il festival ad Arosa ha pudì sa profilar ed ha oz status da cult. Martin Vincenz, il directur da Grischun Vacanzas, ha punctuà il medem, el na sappia betg suandar las ponderaziuns ch'ils aderents da la No-Billag hajan fatg, i saja ina iniziativa nunchapibla en tuts regards. La gliעד ch'è vegnida a la «Manifestaziun» n'han ins betg stui persvader da votar cunter l'iniziativa No-Billag. Per la cultura e per il turissem grischun, la pitga economica pli ferma da noss chantun, avess in gea consequenzas fatalas. L'entira cultura multifara grischuna patiss grond donn irreparabel.

## «Nossa democrazia dovra quai»

Grazia a las taxas da la SRG SSR han ins pudì promover ils davos decennis fitg effectiv la coesium culturala dal Grischun. Ina sparta profitoscha da l'autra, tuttas èn sco ina chadaina che tutga ensemen. Curt avant las 12.00 è cussegliera federala Simonetta Sommaruga arrivada sin il plaz. «No-Billag metta tut en dumonda: il schurnal regional, Schweiz akutell u era la Tagesschau. Quellas emissiuns han dentant ina clera incumbensa: infurmar independentamain da tematicas impurtantas», ha ella declarà. Ellas laschian vegnir a pled tuts, adversaris ed amis da gieus olimpics, protegiders d'animals e chatschadurs, Grischunas e Grischuns, dentant era Turitgais. Las emissiuns dettia en tudetg, talian, rumantsch e franzos. «Exact uschia sto quai esser. Nossa democrazia directa



Nikolaus Schmid tira la spina da contact sco act simbolic. Quai han ins fatg l'entir di per render attent a quai che la No-Billag vul cuntanscher.

dovra quai. Nus stuvain enconuscher tut ils arguments, d'omaduas varts, uschiglio na pudain nus betg furmar in'opiniun.» No-Billag muntia betg sulet «No SRG», l'iniziativa mettia en privel la democrazia, e cunquai la coesium da la Svizra cun sias quatter gruppas linguisticas, ha Sommaruga rendì attent. «Viva la Grischina. In viva sin la cultura e las culturas en noss pajais», ha ella terminà ses curt discurs.

Enfin a las 17.00 ha la presidenta da «cineasts.ch», l'organisaziun dals realisaders da films, pledà, Pascal Gamboni e Rees Coray han chantà. Snook ha fatg rap, Romana Ganzoni ha discurre da la litteratura, Martin Jäger, Vanessa Nicola ha sautà, Bänz Friedli ha fatg cabaret e satira, l'Associaziun grischuna da la musica populara è stada preschenta, medemamain il president da l'Uniun svizra da musica da sturs, Arnold Spescha ha rendì attent als merits ed a las prestaziuns dad RTR, Kobi Gantenbein ha represchentà l'opiniun da la cumissiun da cultura dal Grischun e Roman Weishaupt quella dal Giuven teater grischun. Ina manifestaziun uschè vasta da la cultura grischuna n'han ins probabel anc mai organisà insana en il Grischun. Questa manifestaziun stuess ins repeter era suenter ils 4 da mars 2018. I fess da princip d'organisar regularmain insatge tenor quest model che ha gi lieu sonda passada sin la Piazza Alexander. Era sch'il pievel svizzer refusa No-Billag – quai ch'è da sperar – dovre mintgatant in avis, sco quai che Andy Kollegger, Susanna Fanzun e Nikolaus Schmid han fatg. La manifestaziun ha pudì mussar tge che furma noss chantun. La cultura sutvalitesch'ins savens.



Enturn mezdi è blera gliעד vegnida per tadlar la cussegliera federala.



Suenter ses curt pled sin la tribuna è la magistrata stada anc in mument cun ils organisaders da la manifestaziun.